

---

## ХАЛҚ ДЕПУТАТЛАРИ ВИЛОЯТ КЕНГАШИНИНГ НАВБАТДАГИ СЕССИЯСИ БЎЛИБ ЎТДИ

Бугун вилоят ҳокимлиги катта мажлислар залида бўлиб ўтган навбатдаги эллик саккизинчи сессия ишида вилоят кенгаши депутатлари, кун тартибига киритилган масалаларга алоқадор давлат ва жамоат ташкилотлари раҳбарлари иштирок этдилар.

Дастлаб муддатидан илгари Ўзбекистон Республикаси Президенти сайловини ўтказувчи 11-Фарғона округ сайлов комиссияси таркибини тузиш ҳамда тасдиқлаш учун Ўзбекистон Республикаси Марказий Сайлов комиссиясига тавсия этиш масаласи кўриб чиқилди. Халқ депутатлари вилоят Кенгашининг доимий комиссияси раиси Маъсуджон Сулаймонов округ комиссияси аъзолигига номзодлар билан таништириб ўтди.

Шундан сўнг вилоятда фуқаролар ҳуқуқлари ва эркинликларини, шунингдек, корхоналар, муассасалар ва ташкилотларнинг ҳуқуқлари ва қонун билан қўриқланадиган манфаатларини суд йўли билан ҳимоя қилиш борасида 2023 йилнинг биринчи чорагида амалга оширилган ишлар депутатлар иштирокида кўриб чиқилди. Фарғона вилояти суди раиси Шухрат Камоловнинг ҳисоботи эшитилиб, мавжуд камчиликлар, муаммолар муҳокама қилинди. Уларни ҳал қилиш юзасидан таклиф ва тавсиялар берилди.

Сессия ишида вилоят Маъмурий судининг раиси Дониёрхўжа Махаматовнинг ҳам ахбороти тингланди. Унда одил судловни амалга ошириш, суднинг мустақиллигини таъминлаш, фуқароларнинг ҳуқуқ ва эркинликларини суд йўли билан ишончли ҳимоя қилиш, аҳолининг ҳуқуқий онги ва маданиятини ошириш борасида маъмурий судлар томонидан 2023 йилнинг биринчи чораги мобайнида муайян ишлар амалга оширилгани қайд этилди.

Халқ депутатлари вилоят Кенгашининг навбатдаги эллик саккизинчи сессияси кун тартибига киритилган ҳар бир масала бўйича тегишли қарорлар қабул қилинди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2023-05-17 12:37:31